

Na osnovu člana 65. stav 8. tačka d) Zakona o državnoj službi u Federaciji Bosne i Hercegovine ("Službene novine Federacije BiH", broj: 29/03, 39/04, 54/04, 67/05, 8/06 i 4/12), Odbor državne službe za žalbe donosi

POSLOVNIK

O RADU ODBORA DRŽAVNE SLUŽBE ZA ŽALBE

I. OPŠTE ODREDBE

Član 1.

Ovim Poslovnikom uređuju se pravila i postupak rada i odlučivanja Odbora državne službe za žalbe (u daljnjem tekstu: Odbor), kao i ostala pitanja vezana za rad Odbora.

Član 2.

Odbor ostvaruje svoja prava i dužnosti u skladu sa Zakonom o državnoj službi u Federaciji Bosne i Hercegovine (u daljnjem tekstu: Zakon o državnoj službi), Uredbom o osnivanju Odbora državne službe za žalbe ("Službene novine FBiH", broj 48/03), ovim poslovníkom i drugim aktima.

Član 3.

Odbor ima pečat i druga obilježja u skladu sa propisima Federacije Bosne i Hercegovine.

II. NAČIN RADA I ODLUČIVANJA

Član 4.

Odbor se sastoji od tri člana koje imenuje Vlada Federacije Bosne i Hercegovine u skladu sa Zakonom o državnoj službi.

Član 5.

Radom Odbora rukovodi predsjedavajući kojeg između sebe većinom glasova biraju članovi Odbora.

Član 6.

Odbor radi u sjednici kojoj prisustvuju svi članovi Odbora.

Iz opravdanih razloga (bolest, iznenadna odsutnost, godišnji odmor i slično), sjednica Odbora može se održati ako joj prisustvuju dva člana.

Odluke na ovoj sjednici donose se konsenzusom.

Član 7.

Ukoliko se jedan član Odbora povuče sa dužnosti ili iz drugih razloga bude trajno spriječen za rad, Odbor može nastaviti sa radom do imenovanja novog člana na način propisan u stavu 2. člana 7. ovog Poslovnika.

Član 8.

Sjednica Odbora održava se po potrebi, a saziva je i njome rukovodi predsjedavajući Odbora.

Na sjednici se vodi zapisnik koji potpisuju predsjedavajući i zapisničar.

Član 9.

Odbor donosi odluku većinom glasova svih članova Odbora.

Odluke Odbora potpisuje predsjedavajući.

III. PRAVILA POSTUPKA

Član 10.

Odbor odlučuje u drugom stepenu o svim žalbama koje se izjave na rješenja rukovodilaca organa državne službe, o žalbama koje se izjave na odluke disciplinske komisije i o žalbama koje se izjave na odluke direktora Agencije za državnu službu Federacije Bosne i Hercegovine i to na zahtjev:

- državnog službenika i namještenika na kojeg se sporna odluka, preduzeta ili propuštena radnja odnosi,
- organa državne službe gdje državni službenik i namještenik obavlja svoju dužnost,
- Agencije.

Član 11.

Žalba se neposredno predaje ili šalje poštom organu čija se odluka osporava (u daljnjem tekstu: prvostepeni organ).

Ako je žalba predana ili poslana neposredno Odboru, on je odmah šalje prvostepenom organu radi ispitivanja da li je žalba dopuštena, blagovremena i izjavljena od ovlašćenog lica.

Nakon što je ispitao da li je žalba dopuštena, blagovremena i izjavljena od ovlašćenog lica, prvostepeni organ u roku od osam dana od dana prijema žalbe, dostavlja Odboru žalbu sa svim spisima koji se odnose na predmet.

Ako je žalba nedopuštena, neblagovremena ili izjavljena od neovlašćenog lica, a prvostepeni organ je propustio da je zbog toga odbaci, Odbor će je odbaciti rješenjem.

Kad Odbor primi žalbu za čije rješavanje nije nadležan, žalbu će proslijediti nadležnom organu i o tome obavijestiti podnosioca žalbe.

Ako Odbor ne može utvrditi koji je organ nadležan za rješavanje po žalbi, donijeće zaključak kojim se žalba odbacuje zbog nenadležnosti i zaključak dostaviti podnosiocu žalbe.

Član 12.

Ukoliko žalbu ne odbaci, Odbor predmet uzima u rješavanje. Odbor će sa žalbom razmatrati i dopunu žalbe, ukoliko je podnesena u žalbenom roku.

Članovi Odbora zadužuju se prema redoslijedu predmetima po žalbi i na sjednici Odbora predlažu odluku o kojoj glasaju svi članovi Odbora.

Odlučujući po žalbi, Odbor može odbiti žalbu, poništiti rješenje u cjelosti ili djelimično, ili ga izmijeniti.

Član 13.

Odbor će žalbu odbiti kada utvrdi da je postupak koji je prethodio rješenju (prvostepenoj odluci) pravilno proveden i da je odluka pravilna i na zakonu zasnovana, a žalba neosnovana.

Odbor će odbiti žalbu i kada nađe da je u prvostepenom postupku bilo nedostataka, ali su oni takvi da nisu mogli uticati na rješavanje stvari.

Kada Odbor nađe da je prvostepeno rješenje na zakonu zasnovano, ali zbog drugih razloga, a ne zbog onih koji su u rješenju navedeni, u svom rješenju će izložiti te razloge, a žalbu odbiti.

Član 14.

Ako Odbor utvrdi da su u prvostepenom postupku činjenice nepotpuno ili pogrešno utvrđene, da se u postupku nije vodilo računa o pravilima postupka koja bi bila od uticaja na odluku, da je dispozitiv pobijanog rješenja nejasan ili u protivrječnosti sa obrazloženjem, Odbor će poništiti prvostepeno rješenje i predmet vratiti na ponovni postupak.

Član 15.

Odbor će poništiti prvostepeno rješenje i predmet vratiti na ponovni postupak i kada utvrdi da su u prvostepenom postupku pogrešno ocijenjeni dokazi, da je iz utvrđenih činjenica pogrešno izveden zaključak u pogledu činjeničnog stanja, da je pogrešno primijenjen materijalni propis.

Član 16.

Ukoliko je to potrebno, a i primjereno situaciji, Odbor može saslušati podnosioca žalbe, te kada se to smatra neophodnim, pozvati svjedoke i eksperte.

O preduzetim radnjama iz prethodnog stava sačinjava se zapisnik.

Član 17.

Odluku po žalbi u pravilu Odbor donosi u roku od 60 dana od prijema žalbe i spisa koji se odnose na prvostepenu odluku.

Žalbe se rješavaju po redoslijedu prijema.

Izuzetno, žalbe koje se odnose na zasnivanje i prestanak radnog odnosa imaju prioritet i rješavaju se izvan utvrđenog redoslijeda.

Ako u toku postupka žalitelj odustane od žalbe, Odbor donosi zaključak kojim se postupak po žalbi obustavlja.

Član 18.

Odbor donosi odluke u formi rješenja i zaključaka.

Odluke Odbora su konačne i podliježu preispitivanju od nadležnog suda. Postupak pred sudom može se pokrenuti u roku od 30 dana od dana prijema konačne odluke.

Član 19.

O pitanjima postupka pred Odborom koja nisu uređena ovim Poslovnikom, Odbor odlučuje u svakom konkretnom slučaju.

IV. ZAVRŠNE ODREDBE

Član 20.

Stupanjem na snagu ovog Poslovnika, prestaje da važi Poslovnik o radu Odbora državne službe za žalbe ("Službene novine Federacije BiH", broj 8/05).

Član 21.

Ovaj Poslovnik stupa na snagu danom donošenja, a objavit će se u "Službenim novinama Federacije BiH".

Broj 01-02-207/12
09. novembra 2012. godine
Sarajevo

Predsjedavajući Odbora
Siniša Jeftić, s. r.